



Syahir Syahmi, Nik Afieza dinobatkan olahragawan dan olahragawati terbaik

Atlet petanque Universiti Malaysia Pahang (UMP), Syahir Syahmi Hassan dinobatkan sebagai olahragawan terbaik UMP pada Majlis Penghargaan Sukan dan Pemberian Insentif Kecemerlangan Sukan UMP pada 13 April 2016 yang lalu di Dewan Astaka UMP Kampus Gambang.

Manakala Nik Afieza Che Azhar dinobatkan sebagai olahragawati terbaik bagi sukan bola jaring.

Syahir menunjukkan kecemerlangan apabila mengharumkan nama universiti dalam sukan petanque dengan meraih pingat emas dalam Kejohanan Grand Final IPT 2015 dan Kejohanan Petanque Triple (Lelaki) terbuka Antarabangsa serta pingat perak dalam Kejohanan Sukan MASUM. Manakala Nik Afieza pula mendapat johan ketika menyertai Liga Bola Jaring Pekan dan Grand Final SIRKIT Bola Jaring IPT serta meraih Naib Johan di Liga Bola Jaring IPT 2015.

Pada majlis sama, Timbalan Naib Canselor (Hal Ehwal Pelajar & Alumni) UMP, Profesor Dato' Dr. Yusserie Zainuddin turut diberikan penghargaan anugerah Khas Sanjungan Sukan atas komitmen tinggi beliau yang sentiasa memberi sokongan, kerjasama dan membantu pembangunan sukan di UMP.

Antara anugerah lain yang disampaikan dalam majlis tersebut termasuk Olahragawan Harapan, Olahragawati Harapan, Pasukan Terbaik, Jurulatih Terbaik dan Penyelaras Terbaik.

Bagi Anugerah Olahragawan Harapan telah dimenangi oleh William Soon Siik yang merupakan atlet bola keranjang manakala Anugerah Olahragawati Harapan pula telah dimenangi oleh Nurul Hani Shafiza Hassan yang merupakan atlet memanah.

Anugerah Pasukan terbaik pula telah dimenangi oleh pasukan bola keranjang manakala Anugerah Jurulatih terbaik pula telah diraih oleh pasukan Taekwando dan Penyelaras terbaik telah dimenangi oleh Nurfazilah Amin Nordin.

Majlis penyampaian anugerah disempurnakan oleh Exco Belia dan Sukan Pahang, Dato' Haji Mohd Johari Hussain.

Hadir sama Naib Canselor, Profesor Dato' Dr. Daing Nasir Ibrahim, Pengarah Majlis Sukan Negeri, Mohamed Rashdan Mohamed Razali dan Pengarah Pusat Sukan dan Kebudayaan, Abd. Rahman Haji Safie.

Pada majlis yang sama turut berlangsung Pelancaran Logo Engineers yang bakal melonjakkan semangat atlet UMP. Majlis menyaksikan Pengerusi Jawatankuasa Belia dan Sukan Negeri Pahang, Dato' Haji Mohd Johari Hussain dan Naib Canselor UMP, Profesor Dato' Dr. Daing Nasir Ibrahim hadir melancarkan logo serta menyampaikan anugerah kepada atlet terbaik serta tokoh olahragawan dan oahragawati terbaik.

Profesor Dato' Dr. Daing Nasir berkata, dengan keprihatinan yang diperlihatkan Kerajaan Negeri Pahang serta sokongan berterusan daripada Kementerian Pendidikan Tinggi (KPT) memperlihatkan penglibatan warga kerja dan mahasiswa dalam pelbagai acara sukan mampu memberikan impak yang positif dan konstruktif.

"Impak yang positif dan konstruktif tersebut bukan semata-mata diukur pada jumlah pungutan pingat dalam kejohanan atau pertandingan yang disertai namun yang penting adalah pelaburan UMP terhadap warga kerja dan mahasiswa dalam setiap acara sukan mampu meningkatkan kecerdasan fizikal, kecerdasan mental dan keseimbangan emosi yang memandu mereka sebagai warga kerja dan mahasiswa yang bermotivasi tinggi, berdisiplin, cemerlang, dan berdaya saing," katanya.

Fokus terhadap bidang Kejuruteraan, Sains dan Teknologi Tulen, namun UMP berupaya menampilkan keunikan yang inovatif melalui penyelidikan interdisiplinari yang berkait dengan bidang-bidang selain yang dinyatakan tadi mampu memberi impak yang besar kepada pencapaiannya jika dilaksanakan dengan cekap, terarah dan berkesan.

Selain itu, sebuah Makmal Inovasi Pembuatan, Mekatronik dan Sukan (iMAMS) telah diwujudkan di Fakulti Kejuruteraan Pembuatan (FKP) yang turut memberi fokus kepada penyelidikan berdasarkan kejuruteraan untuk membantu atlet tempatan mencapai aras daya saing yang tinggi melalui pendekatan saintifik.

Justeru, penyelidikan yang dilakukan di Makmal iMAMS pastinya melihat aspek aplikasi teknikal matematik dan fizik untuk membantu menyelesaikan masalah dalam pembangunan sukan untuk membantu pencapaian atlet melalui reka bentuk peralatan, analisis pencapaian atlet, jaminan keselamatan peralatan, pembangunan alat bantu kejurulatihan dan sebagainya. Inilah peranan yang dimainkan oleh para jurutera sukan dalam mengkomplimentari aspek fisiologikal yang dilihat oleh saintis sukan.